

Parlamentario Clarisca Velasquez:

Conmemorando 25 aña di e hazaña di e baluarte di Savaneta Roly Bisslik

ORANJESTAD - 35 aña pasa Roly hunto cu su famia y amigonan a cuminsa duna nos muchanan les di landamento den lama na Savaneta y mirando con nos muchanan



tabata avansando den landamento localmente y internacionalmente a mira e necesidad pa traha un piscina olimpico na Aruba. Roly cu su pasion pa landamento a bin cu e idea di landa di Venezuela pa Aruba pa haci posibel e binida di e piscina olimpico cu tanto e mes a soña. 25 aña pasa exactamente 7 di Augustus 1988 tabata e fecha cu Roly a landa di Venezuela pa Aruba. E hazaña aki Aruba completo a sigui y a bib'e hunto cu Roly via medio di comunicacion y tambe cu nan presentacion aya na costa zuid di Aruba. Hopi hende a compania Roly cu nan boto riba lama. E hazaña aki pueblo di Aruba henter y specialmente nos hendenan di Savaneta a bib'e cu hopi emocion pasobra e tabata un hazaña cu nunca antes ningun

hende a logra y cu tur confianza den Roly pero tambe cu hopi temor pa nada pasa Roly a pone e tensionnan subi. Ora Roly a toca tera na Barcadera despues di 10 ora y 45 minuut pueblo di Aruba henter a celebra e hazaña hunto cu Roly y su famia y amistadnan cu hopi emocion. Roly a landa contra biento y marea y tambe contra olanan di mas cu 12 pia. E hazaña aki a contribui cu por a construi e piscina olimpico cu tanto Roly a soña cun'e pa nos landadonan. E piscina olimpico logicamente a bin na Savaneta caminda mayoria tabata bin practica landamento. Despues di 20 aña na aña 2008 Roly ta wordo honra cu e piscina olimpico na su nomber "Piscina Olimpico Roly Bisslik". Awe nos ta conmemora e hazaña di Roly Bisslik cu



hopi emocion y cariño pasobra danki na dje awe nos tin un piscina olimpico. Roly a haci esaki cu hopi amor pa e deporte di landamento y awe nos por ta orguyoso cu Aruba ta destaca den landamento in-

ternacionalmente! Nos kier a gradici Roly pa su esfuerzo y dedicacion na nos muchanan y na su distrito di Savaneta y awe nos ta reconoce como un baluarte grandi y honra di nos distrito di Savaneta! □